

[Augsburg], 21. Mai 1561

An Johannes Oporinus

UB Basel, Fr. Gr. I 11, fol. 244r.

Steinmann Nr. 734.

Lit.: Husner S. 156.

S. P. D. Tardior D. Carini aduentus editionem Gregorae differt. Arriani 3. reliquos libros ante Pascha confeceram. Sed interim occasio eos ad te mittendi non fuit. Ac ne nunc quidem scio, an per hunc tabellarium eos tibi commode mittere possim. Quod si iam fieri non poterit: differetur vsque ad nondinas, nisi tu prius eos petieris. Tres Epicteti tomos excudendi neque modum neque tempus tibi praefinio, cum quod tuo periculo res agitur, tum quod faetum hunc mihi fore posthumum auguror. Sed Graeca cum Latinis magnitudine folij non incommodè mihi coniungi viderentur. Posset in fine addi etiam Boetius de consolatione philosophica, et Viuis introductio ad sapientiam, et Florentius Volusenus de animi tranquillitate, et alia fortassis eiusdem argumenti, vt iustum volumen conficeretur. Sed haec vt dixi, tui iudicij atque arbitrij sunt. De libris mihi missis debeo liberalitati tuae. In excuso enchiridio nihil admodum desidero, nisi quod Moibani graecum carmen omissum miror. Errata quae correxerim, aut quae de industria mutarim atque addiderim, ex ipso libello, quem cum caeteris mittam, perspicies. Tu si Bibliopolis nostratisbus libros aliquos huc miseris ante nondinas, mihi etiam pro 2. f. Enchiridia separato fasciculo includas velim. Hic enim nulla prostant, et complures familiares ἀδώρητοι παρ' ἐμοῦ τυγχάνοντες μεμφίμοιροῦσιν. Pecuniam in nondinis, si vixero, mittam. Tabellarium hunc non vidi, et ignotis haud temere vel pecuniolam vel libellos committo. Rumor huc allatus fuit de iactura quadam tua, quem cupio esse falsum. Vale. D. Carinum meis verbis saluta et extrude. Eius vnius absentia, quantum intelligo, nobis obstat. 21. Maij 1561.

Hiero[nymus] Wolfius  
T[uus].